

**Sakkutuujusussaaneq pillugu inatsisip allanngorneratigut inatsisit aalajangersimasut  
Kalaallit Nunaannut atuutilernissaat pillugit kunngip peqqussutaatigut  
atuutilersinneqarnissaa Namminersorlutik Oqartussat akuersaarsinissaat pillugu  
Inatsisartut aalajangiiffigisassaat  
*Nunanut Allanut Sillimaniarnermullu Naalakkersuisumit saqqummiunneqartoq***

**Pillugu**

**Nunanut Allanut Sillimaniarnermullu Ataatsimiititaliap**

**siunnersuutip aappassaaneerpeqarneranut**

**ISUMALIUTISSIISUTAA**

Nunanut Allanut Sillimaniarnermullu Ataatsimiititaliap suliarinninnermini inuttarai:

Inatsisartunut ilaasortaq Aleqa Hammond, Nunatta Qitornai, siulittaasoq  
Inatsisartunut ilaasortaq Múte B. Egede, Inuit Ataqatigiit, siulittaasup tullia  
Inatsisartunut ilaasortaq Erik Jensen, Siumut (sinniisoq)  
Inatsisartunut ilaasortaq Hermann Berthelsen, Siumut (sinniisoq)  
Inatsisartunut ilaasortaq Justus Hansen, Demokraatit  
Inatsisartunut ilaasortaq Sofia Geisler, Inuit Ataqatigiit (sinniisoq)  
Inatsisartunut ilaasortaq Pele Broberg, Parti Naleraq

Ulloq 8. oktober UKA20-imi siullermeerinninnerup kingorna ataatsimiititaliap siunnersuut misissorpaa.

**1. Siunnersuutip imarisaa siunertaalu**

Illersornissamat sakkutuujusussaataasut tamarmik assigiinnik atugaqarnissaasa qulakkeerneqarnissaat aalajangiiffigisassatut siunnersuutip siunertaraa. Sakkutuujusussaataasut pillugit inatsit marlunnik allannguuteqarpoq, Kalaallit Nunaannut peqqussutikkut ataatsimoortillugit atuutilissasut siunnersuutigineqarpoq.

Allannguutip aappaani upalungaarsimanissaq pillugu inatsit, inatsimmi nr. 1054 decembarip 23-anni 1992-imeersup kingunerisassai ataatsimoortinneqarlutik. Taaguut “innuttaasunik illersuineq”-mik atuinermiit “annaassiniarmi upalungaarsimaneq”-mik atuinermut allanngortinneqarpoq. Inatsimmi aappaatut allannguut sakkutuujusussaannnginnermik

siunertaqarpoq. Sakkutuujusussat ilaat ulloq 1. januar 2010 sioqqullugu sakkutuungortinneqarsimasut aammalu kingorna sakkutuujusussaatitaanermut inatsimmi malittarisassat malillugit sakkutuujusussatut kinguartitsisimasut inatsisimmi §§ 27 aamma 28 tunngavigalugu sakkutuujusussaatitaajunnaarput.

## **2. Inatsisartuni siunnersuutip siullermeerneqarnera**

Siullermeerinnermi siunnersuutip anguniagai siunertaalu tapersorsorluarneqarput. Upalungaarsimaneq pillugu inatsimmiittumut allannguutit kingunerisassai akerlerineqanngillat. Danmarkimi sakkutuujusussaatitaaneq atuuttoq assigalugu Kalaallit Nunaanni sakkutuujusussaatitaaneq eqqunniarneqarnerseq siullermeerinnermi annikitsumik nalornissutigineqalaarpoq. Aamma kalaallit Danmarkimi ilinniagaqartut piumassuserinngisaminnik ilinniakkatik unitsillugit sakkutuujusussaatitaanersut ernumassutigineqarpoq.

Siullermeerinnermi nalinginnaasumik siunnersuummik akuersaarneq assigiinngitsutigut oqallinnermik pilersitsivoq, tassanilu qulequttat siunissami illersornissamik politikki nunarsuarmilu sumiiffimmi pissutsit oqaluuserineqarlutik. Issittoq aaqqiagiinngiffiussanngitsoq partiit tamarnik isumaqatigaat.

## **3. Siunnersuutip ataatsimiititaliamit suliarineqarnera**

Siunnersuutip siullermeerneqarnerani pissutsit assigiinngitsut, ilaatigut Nunanut Allanut Nukissiuuteqarnermullu Naalakkersuisumut apeqqutigineqartut ataatsimiititaliamit maluginiarneqarpoq. Kalaallit Nunaanni sakkutuujusussaatitaaneq eqqunneqassanersooq aammalu kalaallit Danmarkimi ilinniartut ilinniagaqarnissamut periarfissaannut sakkutuujusussaatitaaneq sunniuteqassanersooq pineqarput.

### **3.1. Kalaallit Nunaanni sakkutuujusussaatitaaneq**

Siunnersuutip siullermeerneqarnera tunngavigalugu Kalaallit Nunaanni sakkutuujusussaatitaanermut inatsisip sunniutai isummerfigissallugit ataatsimiititaliap pingaartissimavaa. Sakkutuujusussaatitaaneq pillugu inatsisip kunngip peqqussutaatigut atuutilersinneqarnissaani Kalaallit Nunaanni sakkutuujusussaatitaanerup eqqunneqarniannngimmat erseqqissarneqassaaq. Sakkutuujusussaatitaaneq inatsimmi § 5 suli atuutsinneqarpoq:

”Taaguut »nuna« inatsimmi ima paasineqassaaq Kunngeqarfik Danmarki, Savalimmiut aamma Kalaallit Nunaat ilanngunnagit.”

Illersornissamut isumaqatigiissutip 2018-2023 malitsigisaanik sakkutuujusussaatitaanermut nammineq piumassutsimik Kalaallit Nunaanni misilitsittoqarsinnaaneq periarfissaalernikuuvoq.<sup>1</sup> Taamaattumillu Kalaallit Nunaanni najugaqaraanni

<sup>1</sup> Aftale på forsvarsområdet 2018-2023, s. 11

sakkutuujunissarlu kissaatigigaanni Danmarkimut angalanissaq pisariaaruppoq.

### **3.2. Kalaallit ilinniartut Kalaallit Nunaanni ilinniarnermi periarfissaannut sakkutuujusussaaneq pillugu inatsisip sunniutai**

Oqallinnermi kalaallit Danmarkimi ilinniagaqartut ilinniagaqarnermi nalaani sakkutuujusussaataaernermi qanoq inissisimassanersut apeqquserneqarpoq. Tamatumunnga atatillugu pissutsit marluk ataatsimiititaliamit eqqumaffigeqquneqarput. Siulleq sakkutuujusussaataaernermi inatsisit § 1, imm. 3 imatut allassimasoq:

”Savalimmiunit Kalaallit Nunaanniilluunniit nuussimasoq taakkunanilu nuani minnerpaamik ukiuni 10-ni najugaqarsimasoq, illersornissamut ministerimit taassumangaluunniit piginnaatinneqartumit qinnuteqarnikkut sakkutuujusussaataaernermit pisussaajunnaarsinneqarsinnaavoq. Sakkutuujusussaataaasup illersornissaqarfimmit aggeqqusissummik tigusaqarnermit kingusinnerpaamik sapaatip akunneri 4-t qaangiutsinnagit pisussaajunnaarsinneqarsinnaanermut qinnuteqaat, tunniutereersimassavaa, takuuk. § 13, imm. 2.”

(Inatsit danskisuinnaq allataammat issuaaneq toqqaannarlugu inatsisartut allatseqarfianit nutserneqarpoq)

Taamaasilluni sakkutuujunissamut aggersarneqannginnissamik kalaallit ilinniagaqartut periarfissaqarput minnerpaamik ukiuni 10-ni Kalaallit Nunaanni najugaqarsimagunik.

Illersornissamut isumaqatigiisummi 2018-2023-mi allassimavoq, sakkutuunngorumallutik nalunaartut 98 %-ii namminneq piuumassutsiminnik nalunaartartut.<sup>2</sup> Maannakkorpiaq sakkutuujusussaataaernerminnik allatsissimasut killilerujussuupput.

### **4. Siunnersuutip aningaasatigut kingunerisassai**

Siunnersuutip piviusunngortinneqarnerani aningasatigut kingunerisassai siunnersuutip nalinginnaasumik oqaasertaliunneqarsimasumi aallaaserineqarput. Tassani allassimavoq kinguneqarnavianngitsoq kunngip peqqussutaani inatsimmi piviusunngortinneqarnissaalu Danmarkimit isumagineqartussaammat.

### **5. Ataatsimiititaliap inassuteqaatai**

Siunnersuut akuerineqassasoq ataatsimiititaliap isumaqatigiittup inassutigaa.


---

<sup>2</sup> Aftale på forsvarsområdet 2018-2023, s. 7

Taama oqaaseqarluni isumaliutissiisummilu allassimanera naapertorlugu paasinnilluni siunnersuut ataatsimiititaliap aappassaaniigassanngortippaa.




Aleqa Hammond  
Siulittaasoq



Múte B. Egede  
Siulittaasup tullia



Justus Hansen




Pele Broberg



Hermann Berthelsen



Erik Jensen



Sofia Geisler